

重修兩淮鹽法志

兩淮鹽法志卷六十

轉運門

緝私二

乾隆三十一年七月運司趙之璧等詳准海州毘連場竈  
爲私梟出沒之所令州同州判等官分汛巡查以專責  
成仍飭該州隨時督察而兩衙門所設阜快不敷分遣  
各添巡役四名以資巡緝嗣於乾隆五十六年詳明將  
巡役改歸該州管理

乾隆三十一年九月淮揚道巴靈阿會同運司趙之璧詳  
興化縣所轄丁溪草堰小海劉莊四場均係產鹽之地

又與坐落場竈之鹽城縣泰州接壤支河汊港繁多原設巡役十三名水手六名不敷分撥請於大鄒莊中堡莊二處添設巡役十名巡船二隻水手四名以資巡緝經兩江總督兩淮鹽政批准

乾隆三十一年十二月鹽政普福奏揚州府屬自泰壩至儀所水程二百餘里爲淮南百餘萬綱食引鹽必由之路每有屯駁船戶勾通匪徒偷爬盜賣爲通河商鹽之累而江都甘泉二縣食鹽口岸尤被占礙因會商督臣高晉虛衷商酌派委督標候補守備一員給與薪水船隻令其帶領船隻巡役自泰壩至儀所往來查緝半年

期滿另委更替如有怠玩不法卽當隨時查辦儻果實  
心督緝著有勤勞亦可再留半年以示鼓勵此外尙有  
江甯府屬上元江甯二縣甯國府屬宣城等六縣俱銷  
淮南食鹽因與浙鹽地界毘連浙私侵越最易各該處  
原設有巡役交地方衙門督緝緣有司政務殷繁未能  
周徧見於上元縣之靖安廠係浙私從入之路派委候  
補守備一員專司督緝宣城等縣與食浙鹽之徽州接  
壤亦擇於最要之界首箬嶺湯嶺口三處派甯國營把  
總一員外委把總二員給與薪水分路帶役巡防半年  
更替俾收實效奉

硃批覽奏俱悉欽此

乾隆三十二年六月鹽政普福奏淮南行銷湖廣江西安徽引鹽俱由儀徵溯江而上江西則由湖口縣入鄱陽湖至省湖廣則由江直達漢口其閒波濤浩渺兼多石磯暗灘鹽船重載一遇暴風急溜趨避不及以致擱淺撞破覆溺淹消誠所不免向例由各鹽道委員勘訊通詳仍令本商補運完額乃有奸頑船戶等將引鹽隨路盜賣一空自行鑿沈船隻捏報淹消亦有中途驚縫進水原可卽行搶救而船戶水手乘機盜賣全報淹沒更有沿江棍徒瞥見鹽船擱淺驚縫卽各駕小船蜂擁而

來名爲救護實則搬搶大爲鹽法之害伏查江面遼闊  
汎弁巡察難週而船戶盜賣非地方官專責未免膜視  
及至查勘淹消亦止就船戶商廝等供詞結案其中有  
無盜賣未能得實臣與督臣高晉再四商酌查儀徵至  
江甯江甯至蕪湖向設候補守備二員巡查江面九江  
至漢口亦有湖北武黃同知查察鹽船其蕪湖至九江  
將及八百里又湖口至南昌四百餘里路遠江寬尤易  
藏奸應請添派督標候補守備二員同原設之儀徵蕪  
湖二守備一體給與薪水船隻輪流更換先令二員自  
儀徵起由長江巡查至湖口縣一往江西一往湖廣仍

三  
查回蕪湖儀徵再換二員前往接巡俾無間斷以杜奸  
匪卽偶有未經目覩之淹消鹽船亦可隨時訪察真偽  
不致一任捏飾欺朦該委弁等並照例半年期滿更替  
如果實心巡防著有勤勞咨會督臣量予獎勵仍留查  
辦倘有疏懈卽行撤換議處以示勸懲奉

### 旨允行

乾隆三十四年七月運司鄭大進等會詳揚州府屬泰州  
分設東臺縣逼近場竈應於境內之朱家尖仇湖莊海  
道口劉莊場四處各設巡役四名巡船一隻水手二名  
以資緝私泰州向設隘口十處每隘巡役五名均在州

境下游請於每隘各裁役一名仍各存四名其海道口  
一處附近何埭場今縣旣設巡所有何埭場巡役十名  
實已允多應裁減五名又劉莊場之斗龍港坐落腹內  
所派巡役二名亦酌減一名共裁減十六名合東臺縣  
添設巡役十六名之數所需巡船四隻卽於各場解存  
變價私船內選撥充巡毋庸另造其添設水手八名飭  
縣募充經督撫鹽政批准裁設嗣四十三年復於縣南  
與如皋交界之處增設陸路巡役四名並於串場河尾  
洋蠻河頭增設巡役四名巡船一隻水手二名又嘉慶  
三年於青蒲閣茅山莊二處各設巡役四名水手二名



巡船一隻

乾隆三十四年九月運司鄭大進等會詳海門廳所轄玉帶等沙內之界港四涯港連源沙洪新官河川洪頭涯港二涯港等處與金沙餘西兩場對峙又萬盛等沙內之蔡家港黃家港雙鼻港年沙洪等處與餘東呂四兩場相隔二三十里均係淮鹽地界私鹽出沒要隘應請統設巡船二隻舵水四名巡役八名專於各港環巡堵緝經督撫鹽政批准飭遵

乾隆三十五年九月兩江總督高晉等會奏江甘二岸官引難銷究由於偷漏太多之故其老弱窮民埽取泥鹽

例所不禁至如船戶偷鹽易換食物雖非私販漁利者  
比然究有礙官鹽嗣後請於各要隘責令分委之文武  
員弁督率兵役實力稽查所有巡役除要路巡察外其  
餘分派沿塘兩岸令各巡商董率梭織稽查凡載鹽各  
船不許將鹽易換食物一經查出送官究處儻巡役懶  
弛巡商督察不力一併責革仍嚴飭該地方官留心查  
察如再有偷漏之弊將文武員弁嚴行參處部覆如所  
議

乾隆三十五年十月鹽政李質穎等奏前鹽政普福以湖  
北宜昌府界連川省鄰私浸灌請將平善壩南津關府

籬設卡稽查最關緊要而審機扼隘尤在得宜查見在設卡處所自東湖縣所屬平善壩起距巴東三百餘里蓋川江自巫峽而來奔騰直放至此稍平故名平善過往客船始能停權巡役方可盤驗故於此間設卡並非舍遠就近竟將巴東等屬置之度外也自平善壩至南津關十五里兩山壁立一水中流實屬天生要隘所以於南津關又設巡役巡船專司堵禦自南津關五里爲

西壩原名府河卽宜昌通判駐劄之所均係扼上游之  
要區入楚必由之徑路該通判分派巡役督率稽查如  
遇川私偷卡越渡上則鳴鑼操舟追趕下則接應堵截  
並無別徑可以遁藏自西壩以下一百五十里爲宜都  
縣之白洋河江流始緩水陸交通商民舟楫必於此停  
泊恐有私鹽船隻由卡逸出故於此處亦設有巡船巡  
役似此層層攔截節節盤查立法實極周詳而川私猶  
有未盡者此非立法之不備實奉行之未力也查原奏  
內稱巫山峽口以下山高水緩又有口門收束江面不  
寬便於稽查等語夫巫峽之水當其出口勢若建瓴奔

騰衝激一往莫禦舟行其間捷如飛隼設立巡船豈能  
停駐且又令過往客船於怒濤巨浪之中轉舵迴棹聽  
其查驗准情度理實不能行至稱將平善壩等處之巡  
役移設於楚蜀交界之處是將要隘有用之巡役而改  
設於無能爲力之地何益於事再稱巴東等處山僻小  
路可通下游各邑俱爲見設卡巡所不及稽察伏查川  
私之爲害於淮引者以其由水路而來巨艦連檣蔓延  
甚遠所以必設法嚴拏務期淨盡巴東歸州重巒疊嶂  
鳥道崎嶇私鹽非驢騾馱載所能行必人背負而後走  
一人背鹽不過三四十斤上下危峰日行不過三四十

里且民戶畸零窮陋售賣亦殊有限所以陸路之私常  
少其報獲者每起不過三五十斤並無巨夥其明驗也  
至於南沱黃陵廟等處見有西壩通判督役遊巡亦毋  
庸重複設卡惟查白洋河爲川船總匯之處凡上游疏  
縱之私船必由此處經過見雖設卡巡役止十名支河  
汊港又多巡察實難周徧且與西壩通判相隔一百餘  
里鞭長莫及巡緝最易懈弛今酌議於白洋一處添設  
巡役二十名巡船四隻選擇勤慎幹練商人專司其事  
原有之巡役一併責令督率巡查所需費用請於裁存  
卡費內動支照例給發如拏獲川私船隻非係上游疏

縱卽屬賄放將管卡之員嚴加參究卡商疏懈卽行責革更換再乾隆三十九年宜昌通判移駐西壩案內吏部議令荆宜施道就近督察並宜昌鎮標派撥弁兵東湖縣派撥捕役各就本汛巡查及巴東歸州興山長陽如遇淮鹽不能接濟遵照乾隆二年奏准仍遵零星食鹽免其緝捕之

恩旨聽從民便零買川鹽不得過十斤以上亦不許轉相貨賣之處均請仍照舊章辦理奉

硃批著照所請行欽此

乾隆三十六年正月運司鄭大進等詳上元江甯二縣向

設商巡原爲杜私疏引起見乃私鹽仍然充斥官引滯  
銷徒耗商資所有商巡一概裁汰仍於上元境內水路  
之河口朱家嘴石埠橋觀音門四處各設巡役五名水  
手四名巡船二隻陸路之土橋上閣菴湯水三處各設  
巡役八名又湖墅張橋二處各設巡役四名統歸上元  
縣管轄督緝並於江甯水路之下關江口共設巡役八  
名水手四名巡船二隻歸江甯縣管轄督緝另設巡役  
二十名水手四名巡船二隻歸南捕北捕二通判管轄  
調撥遊巡經總督鹽政批允飭遵

乾隆四十三年七月戶部覆准大學士仍管兩江總督高



晉等會奏兩淮附近場竈向不行銷官引之通州海州  
泰州東臺興化鹽城阜甯如皋安東各州縣濱海貧民  
仍照向例官給循環號籌赴場買鹽挑負該處村莊售  
賣並查明各州縣見在滋生戶口歲需民食鹽斤若干  
令各場商人於按額配引之外照數酌留驗籌賣給將  
老少鹽名目永遠革除一切給籌更換定地限日造冊  
申報稽查透漏各事宜悉照舊例責成各地方官暨場  
員辦理

乾隆四十七年六月兩江總督薩載咨部據江蘇按察司  
李慶棻運司倉聖裔准揚道王問羹會詳泰州有泰壩

擡鹽浦地方向來場鹽過壩每有拋撒泥鹽例許貧民  
埽食不得售賣乃附近奸民圖利往往零收回積售私  
濟販查泰州從前原設巡役五名水手二名巡船一隻  
與泰壩廳所管巡役二十名巡船水手八名會同在浦  
巡查於乾隆二十六年奉文以泰壩既有委員將州設  
巡役水手裁汰是緝私之責應在泰壩委員請嗣後擡  
鹽浦地方專責泰壩委員督役巡查仍照向例獲私四  
十斤以內隨時發落具報四十斤以上者移州辦理部  
議覆准

乾隆四十七年十二月軍機大臣會同戶部議奏各省巡

鹽官兵向有收存鹽規房地租銀作爲巡緝之費前於  
議給武職養廉案內奏明武職員弁巡緝私鹽乃分所  
應爲今已給予養廉其向得鹽規等銀自應停給存儲  
運庫另行撥用至兵丁得項無多往返緝查不無所需  
仍應照舊支給其向委候補千總及額額外委巡緝之  
處應令均責成專汛及鄰汛額缺員弁經管設有身離  
本汛派委他處巡緝堵禦者仍於節省銀內酌量給予  
盤費以資辦公奉

旨依議欽此

恭載

上諭一道  
德音

乾隆四十七年十二月兩淮運司倉聖裔詳江甘儀泰一

帶前因匪徒地棍勾通屯駁船戶偷爬盜賣是以乾隆三十一年前鹽院普奏准於督標酌委候補守備一員將江甘搜鹽廳巡役十六名水手八名巡划船八隻船牌八名原係裁存揚巡原帶跟役歸於委弁帶領巡緝又上下關遊巡商二名巡役十六名巡船四隻船牌四名泰州碑亭巡役四名巡船四隻船牌四名並歸兼轄今委弁既經奉裁責成專汛營員巡緝所有委弁原管之巡役十六名水手八名船牌八名同軍牢四名均應一併裁汰其巡划船八隻座船一隻飭令江都縣變價充公至上下關遊巡及碑亭船役本屬商役應同原設

沿河八塘商役一併照舊存留責成總巡管束稽查專司護送屯船如有偷爬盜賣等事惟該總巡是問經總督薩載鹽政伊齡阿批准飭遵

乾隆五十三年四月江蘇按察司康基田運司倉聖裔會詳江都縣境內之白塔河係通江要道宜陵後孔家涵兩處又通達場竈均爲私鹽出沒之區請將鈔關汛協防外委把總一員帶兵十名移駐白塔河關口仍令瓜州營於東岸派兵五名歸該外委鈐束並於江邑額設六汛巡役內每汛抽撥一名分派白塔河宜陵後孔家涵三處巡緝添設巡船三隻水手六名令該管萬壽司

巡檢芒稻關官會營督率兵役校織遊巡經總督書麟  
鹽政全德批允飭遵

乾隆五十三年四月兩江總督書麟奏查江蘇省淮安揚  
州通州海州四屬地接場竈私鹽最易透漏安徽太平  
和州泗州等屬與江蘇接壤水陸易達尤爲私梟出沒  
之區各該州縣向俱設有巡役會同營員派撥弁兵水  
陸分頭巡緝復於扼要處所經臣衙門專委標弁駐劄  
協巡基布星羅本屬周密祇緣文武各員並不實力緝  
拏甚或得規縱放以致梟販不能淨絕見在查照向定  
章程欽遵

諭旨嚴飭所屬文武員弁實力查拏務期私販斂迹儻仍有意  
玩之員卽遵

旨參奏治罪斷不敢稍事寬縱至大夥私梟必藉船隻裝運而  
越境售賣不能不經關口臣所轄江南江西兩省有淮  
安揚州龍江蕪湖九江關口五處若於往來船隻及回  
空糧船認真盤查不獨大夥私販斷難越渡而回空糧  
船亦豈能夾帶惟緣守口員役僅知稽查稅貨其有無  
夾帶私鹽並不過問是以從未有私鹽關口查獲之事  
臣已分別咨行各關監督及委管道員嗣後經過船隻  
及回空糧船責令認真查驗如有夾帶卽將人犯拏交

地方官究辦奉

硃批實力爲之欽此

乾隆五十四年九月兩江總督書麟奏江西省行銷淮鹽之建昌府屬與閩省之光澤縣接壤乃閩私之來源饒州府屬與安徽省徽州府及本省之廣信府接壤乃浙私之來源閩省私販一由新城縣之杉關飛鳶陸路運至石峽地方上船順流而下由建昌而達撫州旁及南昌各屬一由瀘溪縣之花山鐵牛關陸路直達撫州浙省私販一由安徽省之婺源縣入江西之德興縣一由安徽省之祁門縣入江西之浮梁縣一由廣信府地方入饒郡



之安仁縣是建饒二府乃淮鹽之門戶而新城瀘溪德興浮梁安仁五縣又爲私販咽喉必當於此五處嚴加堵禦則來源可絕應請每處由江西撫臣選派勤幹雜職一員飭令各該處地方官撥給鹽快十名並令南昌鎮臣選派千總一員於就近營分撥給兵丁十名飭令會同前往督率該處卡商巡役於水陸兩途分頭巡緝半年一次更換所獲私鹽交商變價分賞兵役其人犯交地方官審辦部議覆准

乾隆五十四年九月鹽政全德檄行江甘舊設商巡相習懈弛以致私鹽充斥官引滯銷今飭據總商羅榮泰等

議稟自壩至儀計程二百二十餘里准其將舊設塘巡  
改爲十里一塘共設二十二塘每塘巡商一名巡役三  
名巡船二隻船牌四名責令將屯駁鹽船自第一塘起  
逐塘挨次押送以免偷爬逗遛並令沿河巡查遇有販  
私船隻卽交該地營汛稟報復於五十五年六月鹽政  
以設巡以來不但獲報功績甚少且儀捆斤兩亦多短  
缺徒糜辛工無裨實政行司將各塘商役概行裁撤仍  
飭令縣營嚴督兵役實力查緝如有疏縱分別參處

乾隆五十五年八月湖南北鹽法道等會詳案奉督院派  
委千把二員分往湖北襄宜二屬守備一員前往湖南

衡州查緝私鹽按三月一換又奉湖南撫院於東安縣之石期市藍山縣之藕塘鋪常甯縣之常甯河口耒陽縣之阜頭街並零陵永興二縣各派千把一員又於衡永一帶派委守備一員專司巡緝所需飯食統於漢店辛工火足項內撥給經湖廣督撫兩淮鹽政批允

乾隆五十六年二月兩江總督孫士毅於查辦淮北私鹽案內行令壽春鎮總兵淮河口至舊縣鎮爲私販水運要道派將備二員千把外委四員兵二百名馬家岡蚌埠乃鹽梟盤踞之所派將備一員千把外委二員兵一百名駐劄往來巡緝俟三月期滿另派更換所需鹽菜

口糧令淮北各商帶納供支旋於是年四月安徽司道等會稟淮北私鹽此番大加懲創梟匪多已就獲從嚴究擬然不於要隘處所設立防範仍恐故智復萌乘懈而出自應酌留兵丁以防將來而其最扼要處則泗盱交界之前後兩關頭鋪河一帶爲淮北私鹽入境咽喉查頭鋪河南岸有泗州營駐城之兵足資防禦惟北岸空闊請酌留將官一員千把二員兵丁十名蓋造草房在彼駐劄與泗州營隔淮對峙互相稽查其餘各兵概撤還汛並於九里澗灰溝劉家嘴三處各蓋卡房卽於駐劄兵內每處酌撥五名十日一次更替駐宿瞭望偵

探一有私梟來蹤飛稟南北兩岸將官協同地方官合  
手捕拏仍照前議三月一換又於八月經總督書麟咨  
會鹽政全德以前後關一帶爲淮北私梟扼要之處地  
方遼闊且九里澗灰溝劉家嘴三處又須分派兵丁偵  
探前議止留兵丁六十名不足以壯聲威應再添撥兵  
丁四十名連前共一百名以資巡緝

乾隆五十六年四月兩江總督孫士毅署江西巡撫姚棻  
奏建昌府所屬之新城廣昌南豐瀘溪四縣與閩省之  
光澤建甯等縣地界毘連而閩境鹽店隨在開設建屬  
人民越境販買甚爲近便是以該府一屬淮鹽每致滯

銷委令護鹽道恆甯親赴各交界處所確勘透私要隘如新城縣之盧家嶺山岡口二處與福建光澤縣接壤南城縣之水濺架地方爲閩私水陸總路南豐縣之百丈嶺夫人嶺二處與福建光澤建甯兩縣接壤瀘溪縣之椒溪朱崖藻坪陳坊貓兒嶺五處與福建光澤縣連界均爲私販出沒要路從前未經設卡必需設立卡房添派兵役召募巡丁以資駐守其餘私販小徑如新城南豐二縣之洋頭隘洲湖原馬鞭隘青山隘南城縣之萬年橋東岸廣昌縣之牙蘇山船尖隘涼山棟等處亦應一律堵塞以防透越伏查建昌一郡從前雖經派委

員弁兵役分頭巡緝祇緣扼要之區並無棲止之所難以駐守以致私販仍然伺間透越茲據議請於各要隘添設卡樓五座瞭臺二座卡房二十一間小屋二間卡牆二道酌量添派兵役召募巡丁以資常川駐守實力堵緝臣等詳加確核均屬事在必需亟應籌辦至應設卡樓瞭臺房牆估需工料銀兩及巡防員弁兵役日需工費飯食等項據商人情願捐建解給其派巡員弁照例半年更換按其銷引分數報部核議並將各屬私販小路飭令一律堵截謹將各縣添設卡樓卡房處所及添派員弁兵役名數另繕清單敬呈

御覽

新城縣

一該縣杉關附近之盧家嶺設卡樓一座並於樓後一矢之外建立瞭臺一座杉關原派有文武員弁各一員兵役二十名今盧家嶺添設卡樓瞭臺應於就近汛兵內再添撥十名足資查緝

一該縣之山岡口北首建小屋二間東南設卡樓一座卡房三間卽委該縣佐雜一員帶領鹽快八名並於建昌營派撥千總把總或外委一員帶兵八名分駐守禦  
南城縣



一該縣之硝石池北水濺架地方原有石橋一座於橋南添砌石牆一道安柵晝啟夜閉並於橋北設卡房三間在於就近汛內撥兵五名召募巡丁五名駐守查緝南豐縣

一該縣之百丈嶺設卡樓一座並於相隔兩矢之地方設瞭臺一座由建昌營酌派外委一員撥兵十名並由縣另派鹽快十名協同該處卡巡防守並令附近邗都之龍池司巡檢一體查緝

一該縣之盤湖隘原設有汛防相距二里之夫人嶺添設卡樓一座卡房三間卽委該縣佐雜一員帶領鹽快

八名協同盤湖隘弁兵卡商一體實力巡防以資堵禦  
瀘溪縣

一該縣花山界附近之椒溪地方建設卡樓一座東南  
之朱崖西南之藻坪陳坊西北之貓兒嶺等四處各設  
卡房三間並於貓兒嶺脊設立卡牆一道安柵啟閉該  
處花山汎原經派有文武員弁兵役卡商巡丁在彼巡  
查今附近椒溪地方添設卡樓應令兵役就近分駐巡  
緝毋庸添撥惟朱崖藻坪陳坊貓兒嶺四處卡房應令  
瀘溪金溪二縣會營每處各派兵役三名駐守查緝經  
大學士和珅等議駁奉

諭旨江西私鹽尤多著長麟全德卽行前往其地詳悉妥議速奏嗣經鹽政全德覆奏定地銷鹽成案奉

旨悉仍其舊所有添設卡巡章程照孫士毅所奏辦理欽此

乾隆五十六年五月江蘇巡撫覺羅長麟江西巡撫姚弢兩淮鹽政全德會奏建昌一府實爲江西淮引藩籬向係淮商由大江運鹽至省城轉付水販認領行銷各水販既經領引開店遂得假公行私卽或設卡添兵能絕私販來源而水販有意刁難轉或暫時歇業不惟引課虛懸小民亦多淡食是欲緝私亟宜先開引店請於建昌府籤派妥商一名開設總店一處所屬四縣分設子

店俾民間俱有買食之處水販不致壟斷居奇仍由鹽道隨時查看銷售情形督令源源接運再閩省與建昌府接壤之各州縣見在鹽價每斤二十八文建昌府鹽價每斤三十四文非獨此縣價貴彼縣價賤其犬牙相錯處且有兩縣民人共處一村東鄰食賤西鄰食貴者應請將建昌府屬五縣照閩省時價減爲每斤二十八文文明張曉諭使民周知兩省鹽價旣屬相同私販無利可圖自必漸爲斂迹此後總照閩鹽價值隨時長落在商人於此一府獲利稍微而合通綱之力亦不致虧折成本至向來緝私之法未嘗一日或廢而梟販未能盡

淨者大抵兵役不實心任事之故嗣後無論巡役兵民但能拏獲私販者即將所獲鹽貨車船頭匹全行賞給其所賞鹽斤許該巡役兵民卽攜赴就近官商鹽店令商人查照見賣時價八折給領鹽斤由商轉銷至所賞車船頭匹亦卽於獲犯之日准該巡役兵丁自行看管定案之日卽准其自行變賣儻兵役等仍敢包庇縱私與梟犯一體治罪該管官弁嚴行參處經大學士伯和珅等議覆籤商開設官店全賞鹽貨車船頭匹均應如所奏辦理至據請將建昌府所屬五縣鹽價照閩省行銷時價減爲每斤二十八文固係減價敵私之法但閩

鹽侵銷建昌已非一日今見建昌鹽價與該處相埒奸  
販等何難暫時再減臣等悉心核議如閩省行銷時價  
每斤二十八文者建昌減爲二十六文若閩省減爲二  
十六文則建昌減爲二十四文總比閩省較賤則私販  
無利可圖其侵越之弊自可不禁而止再附近建昌之  
撫州等處離閩境亦不甚遠該處鹽價諒與建昌相等  
若僅減建昌則私販等勢必繞道越過建昌潛赴撫州  
等處私自行銷立法尙未盡善應令該撫等將附近建  
昌之撫州等處鹽價每斤若干文詳查酌減嗣經覆奏  
建昌額銷七千五百餘引以見在所減之價而論須貼

補銀三萬四千餘兩今設店減價則所銷必不止此數  
每年約須二萬餘引其貼費不下八萬九千餘兩若撫  
州亦復減價則撫州額銷四萬七千五百餘引又須貼  
銀十九萬三千餘兩各商以江西通省額鹽僅二十七  
萬餘引卽盡數銷足亦不能有此贏餘且撫州水販向  
係在於省店照部定之價買鹽轉售若獨於撫販另減  
價值則各府水販皆將冒充撫販來買賤鹽其貼費更  
無所底止所有撫州鹽價應請免其議減復經大學士  
和珅等奏撫州府引鹽節年奏銷冊報皆不足額可見  
該府情形與建昌大略相同恐該處水販亦有增價轉

賣之弊以致官鹽不能暢銷請交江西巡撫就近查明撫州府行鹽時價據實登覆旋經江西巡撫姚棻咨覆江西省南昌等十府銷鹽定價每包俱係二錢七分三釐九毫七絲零並加省鋪店費五毫水販餘利五釐五毫每包共應賣銀二錢七分九釐九毫七絲零各府價值俱屬一律其自省岸運赴各府屬係按道里遠近分別加增運費撫州府屬六邑每邑各加運費四五六七釐不等每斤賣銀三分九釐一三四五毫零不等經戶部覆准撫州府鹽價既據查明與建昌較貴並聲明與南昌臨江吉安等府屬鹽價相等應卽照見在咨報情



形辦理

謹按乾隆五十七年護理江西巡撫託倫咨准部覆嗣後人鹽並獲者照依新例全行給賞如獲鹽不獲人者將鹽貨車船頭匹概以一半給賞一半照舊報解運庫充公

乾隆五十七年八月鹽政全德批准江西鹽法道稟建昌一府與閩省光建等邑接壤建昌下游卽係撫郡雖各卡弁兵堵禦嚴密而小徑叢雜或閩私度山越嶺潛入撫境或建郡小販將減價之鹽零星偷漏致阻撫額請於建郡下游淤牛地方及撫屬金谿縣所轄之許灣每

處派撥商夥一人雇募巡丁十二名駐守堵緝所需房租辛資工食銀兩由商捐給

乾隆五十七年九月運司柴楨等會詳淮北海州桃源清河潁榆等州縣俱切近鹽場又去洪湖不遠全賴堵私扼要周密巡防庶得官引暢銷梟徒斂迹請於桃源縣境內之三岔添設巡役四名曾家嘴桂家嘴設巡役二名南馬廠係陸路要道添設巡役二名均令該汛巡典把總會同協巡又海州所轄之灌河口派兵四名歸佃湖營汛弁巡守其灌河以內之響水口添設巡役四名責令海州惠澤司巡檢督防上坊鎮派兵六名歸海州

營汛弁督緝添設巡役八名歸海州州判督防此外海  
州鹽灘扼要之桃園莊窰上莊岡子嘴洪河堰各派兵  
二名巡役二名兵由海州營汛弁專查役由海州州同  
督防九里山牛王廟小村莊新縣各派兵二名巡役二  
名兵由東海營汛弁專查役歸海州州同督防宋家莊  
官莊狼家莊吳家樓小吳二公新河頭石橋口各派兵  
二名巡役二名兵由海州營汛弁專查役歸海州高橋  
司巡檢督防贛榆縣近灘扼要之第二溝莊小河口江  
家莊木頭溝洋爾莊小洋爾莊匡家湖羅家湖龍王廟  
各派兵二名巡役二名兵由海州營汛弁專查役歸贛

榆縣督防至清河縣所屬之徐家溜乃海州場私由旱路入湖經行要道設立巡役二名並於舊城汛撥兵二名馬家河審河各設巡役二名於舊城汛撥兵各二名歸馬頭司巡檢會同把總協力督緝經兩江總督書麟等批准添設

乾隆五十八年四月湖廣總督批准湖南鹽法道詳常甯縣屬之秧田地方與桂陽州交界並與耒陽清泉等縣相通係粵東私鹽出沒要隘應派撥千把一員帶兵六名查緝三月一換

乾隆五十八年十一月運司曾煥詳甘泉縣境內之邵伯

鎮濱臨湖蕩逼近場竈爲淮南綱食門戶私鹽侵越要隘應仍設巡商一名巡役十名水手三名巡船三隻遊巡偵緝經鹽政董椿批允

乾隆五十九年七月運司曾燠等會詳揚州府屬之江都縣界連泰州爲私鹽出沒隘口梟徒因各處通江水路多有巡役防守難以偷渡每多用擔裝挑由僻徑運至嘶馬地方之坍江下船直達徒陽二邑其間必由縣境東鄉之張汪溝大橋嘶馬三鎮經過該三處尙未設巡應添設巡役六名酌給飯食以資堵禦經督撫鹽政批允

乾隆六十年閏二月河南巡撫阿精阿奏欽奉

上諭福甯奏襄陽拏獲豫省私鹽十餘起又在宜昌地方拏獲  
囤積私鹽之戶著傳諭阿精阿即將此次私鹽是否河  
東私販抑係長蘆偷越之處查明究辦並於口岸嚴密  
稽查等因欽此伏查豫省行鹽各界彰德衛輝懷慶開  
封陳州許州等屬界連直隸向俱行銷長蘆引鹽歸德  
府屬以及衛輝府屬之考城一縣界連山東向俱行銷  
山東引鹽汝甯府光州等屬界連湖北向俱行銷淮北  
引鹽陝州汝州河南府南陽府等屬界連山西向俱行  
銷河東引鹽迨五十七年河東鹽課改歸地糧其池鹽

聽民自行販運在於原舊行銷引鹽地方售賣其中南陽府所屬之新野鄧州唐縣南陽淅川內鄉桐柏等州縣與楚省行銷淮鹽之襄陽鄖陽等縣界址相連淮鹽每斤賣錢三十餘文河東池鹽每斤賣錢二十一二文不等在自運池鹽之民越界圖利而買食淮鹽之民避貴趨賤皆所不免見在楚省拏獲之私鹽除宜昌不與豫省接界應聽楚省查究外其襄陽所獲私鹽自係河東私販由豫闖入似非長蘆偷越業經咨詢湖廣督臣所獲究係何處私販俟覆到另辦至於豫楚交界各屬水陸要隘應行添撥兵役設卡巡防並委妥幹員弁實

力督查毋許池鹽侵越楚界違者拏究鹽斤入官復恐  
該地賣鹽鋪戶勾串販私之人代爲寄頓鹽斤乘間陸  
續偷運應將切近楚境二三十里之鹽店移撤三十里  
之外並毋許多積鹽斤以絕其偷運越界之弊仍咨楚  
省在於入界各處一體設法堵禦部議應如所奏辦理  
仍令各該督撫卽將豫楚連界各屬應於何處巡緝堵  
禦聲報地名里數勿致池鹽透漏之處專案分晰報部  
查核嗣經河南巡撫咨覆南陽縣雖未與楚省毗連但  
賒旂店爲池鹽總匯之所瓦店係水陸扼要之區唐縣  
之倉臺鎮距楚界十五里係水陸通衢運鹽要口張博



士店距楚界十二里不通河道向由陸路運鹽湖河四莊二處與楚省地界毗連民居錯雜最易透漏其鹽斤必由張博士店及黑龍鎮運送鄧州與襄陽交界相距十五里之都司衙十二里之劉家集十里許之夏莊小孫莊八里許之魏家集又與光化交界相距六里之張家店三里許之玉皇閣孟家樓等處均屬要隘桐柏縣之鍾家岡姚河集出山店固縣集月河店五處距楚省隨州棗陽界均在三十里之內內鄉縣南路之順陽川黨子口高家岡均與湖北均州交界新野縣東路鄰近楚界四里許之趙家橋焦家灣三里許之水臺村一里

許之梅家灣南路鄰近楚界十五里之新店鋪文家橋  
觀音寺二里許之黃家集一里許之張家集袁家灣大  
石橋等處淅川縣之荆子關白亭店與楚省鄖縣連界  
又李光橋與楚省均州連界俱係水陸要口以上共三  
十七處均經設立卡房多派兵役並飭南陽府督同地  
方文武員弁晝夜躡緝相應咨復又湖廣總督咨復均  
州水路小江口與河南內鄉屬順陽川相距二十餘里  
而順陽川卽與高家岡地方毗連見在小江口設卡堵  
禦又陸路白土嘴與河南內鄉縣屬黨子口地方交界  
石板河與河南淅川縣屬李官橋地方交界均經該縣

移會營汛督同吏目不時巡查並多撥兵役設卡堵禦  
又襄陽縣東北鄉石臺湖與河南唐縣倉臺交界又石  
臺湖鄆家埠口蔡新集上泥河與河南新野縣屬黃家  
莊喬家灣梅家灣王家莊蕭家莊交界正北鄉破碑鋪  
黃渠鋪喬家岡與河南新野縣張家集通南橋大石橋  
交界又清涼寺北路並與河南鄧州劉家岡魏家集交  
界西北鄉淨土寺黑龍集與河南鄧州李家營明家橋  
交界查河南唐縣之倉臺鎮張博士店湖河四莊黑龍  
鎮新野縣之趙家橋焦家灣水臺村梅家灣新店鋪文  
家橋觀音寺黃家集張家集袁家灣大石橋鄧州之都

司衙劉家集夏莊小孫莊魏家集張家店玉皇閣孟家樓均爲私鹽聚集之處與襄陽縣交界前於鄆家埠口設卡一處飭委雙溝巡檢帶領縣役五名會同專汛千把帶領目兵晝夜梭巡又於兩河口設卡一處籤派巡商並委雙溝巡檢帶領縣役六名會同專汛千把帶領目兵晝夜梭巡以截唐縣新野之私又於黃渠河設卡一處飭委呂堰巡檢帶領縣役五名會同專汛千把帶領目兵晝夜梭巡以截新野鄧州之私又於黑龍集設卡一處飭委油坊巡檢帶領縣役五名會同專汛千把帶領目兵晝夜梭巡以截鄧州之私又於樊城設卡一

處籤派巡商並委典史帶領縣役十名會同專汛千把帶領目兵晝夜梭巡以截唐縣新野鄧州諸處之私以上六卡仍會同襄陽城守營遊守襄陽鎮右營遊守不時親歷稽查堵緝又棗陽縣北境之寺莊店與豫省唐縣交界距唐縣新店地方二十里西北與唐縣湖河鎮毘連東北與桐柏縣之落湖陂毘連三處皆共轄之區係陸路豫私易於透入向在毘連處設立卡房兵役巡防茲查鍾家岡接連該縣與桐柏共轄之落湖陂相距三里姚河集雖與該縣並隨州交界尙距落湖陂界四十里已於鍾家岡姚河集落湖陂通該縣境之錢家岡

設卡一處派撥兵役巡緝並營汛典史不時分往稽查  
又光化縣與豫省鄧州接壤孟家樓附近之韓家樓相  
距鄧州屬張家店六里之陳家樓毘連鄧州屬之玉皇  
閣各設早卡一所並於豫省水陸相通之薛家集三官  
殿老河口客落湖秦家集各設卡所派撥兵役巡緝又  
於孟家樓相距四里之扼要韓家塘並於鄧州都司垵  
路徑相通之張前營及玉皇閣相距八里之要隘傅家  
營並於內鄉淅川旱道相通之河家樓及水道上通小  
河口之潘家巖等處各添一卡均撥兵役嚴密堵截又  
穀城縣東鄉之張家集與襄陽縣之袁家沖光化縣之

高家灣犬牙相錯而光化縣之李家凹卽與鄧州之黑龍集接壤襄穀交界之文家河亦屬私鹽出沒要道前經選撥兵役在於張家集文家河設卡堵緝又應山縣平靖關距河南信陽州譚家河十五里武勝關距信陽觀音河十五里王土關距信陽界河十里吳家店北距漿溪店二十里漿溪店至信陽張家信店二十里西距隨州巖子河十五里內與信陽連界花山店距信陽黃朋坳十五里許家沖距信陽臺子畝二十里此各處實爲私鹽入境侵越之區業經設卡派撥兵役巡守堵禦又隨州界牌口與河南姚河集相離二十里固縣集距

該州淮河店三十里月河店距該州出山店十五里向  
爲豫楚往來要道又小林店距信陽界十五里吳山店  
與棗陽縣連界大悲店距棗陽縣界十五里青河店距  
棗陽縣界十里均設卡房添撥兵役晝夜輪流堵緝又  
鄖縣與豫省淅川縣毘連之荆子關設有守備一員白  
亭店亦設有卡房該縣會同營員選撥兵役巡查查晉  
省鹽稅攤入地丁鹽無統轄越豫侵楚久經在於各處  
緊要隘口設立官商巡卡嚴飭文武員弁實力巡緝並  
委參守大員帶兵堵禦在案應咨豫省在於交界處所  
一體防範以盡根株部覆仍咨河南巡撫將豫楚二省



私鹽入界參差處所一體嚴飭查辦

乾隆六十年三月運司曾煥議詳江南泰興營都司所轄  
汎地西臨大江東北毘連場竈水陸路徑紛歧透私最  
易請於扼要之黃橋派兵六名季家市五名毘羅市黃  
家港各四名派把總一員督緝又包家橋派兵八名專  
撥把總一員督緝又遷善鋪口岸汎馬店三處各派兵  
三名五洲嘶馬各二名派外委一員督緝又添設巡船  
三隻每船舵水五名划船二隻每船舵水三名均經總  
督鹽政批允

乾隆六十年十二月運司曾煥詳准江都縣之廖家石羊

董家三溝俱通大江爲透私要隘於該三溝口密釘雙層排椿木柵加管木簚纜編紮牢固並於舊陞一二里之外加釘雙層排椿一道每溝專設夫役二名責令晝夜巡查看守以資堵截

嘉慶二年五月運司曾燠詳甘泉縣西鄉陳家集向設總店分售見在銷滯若不設法巡緝終無起色應設巡役十四名飭令上官司巡檢督率查拏經鹽政徵瑞批允嘉慶二年六月鹽政書魯批准運司曾燠詳三江營地方係私梟經由要道該處備弁兵丁專爲緝私而設請添巡船三隻每船舵工一名水手四名常川駕巡

嘉慶二年十月運司曾煥淮揚道和騰額會詳洪澤湖水  
面遼闊港汊繁多南岸已經設巡嚴密而北岸之王家  
營楊家莊禦黃壩南河口武家墩皆爲私鹽入黃渡湖  
要隘若不專設巡緝難免疏漏請於王家營設兵二十  
名楊家莊十五名禦黃壩三十名南河口二十名武家  
墩十五名千把五員以上各處皆屬河標操營管轄應  
飭河標中營副將選派幹弁督兵分駐巡緝酌給飯食  
仍令派出弁兵每月前赴清河桃源各私囤處所密查  
一二次俾私梟斂迹又洪湖以南淮河口舊縣鎮馬家  
岡等處原設巡兵一百名除奉撥三十名移駐鳳臺縣

之闕曠集祇存兵七十名分布百餘里未免顧此失彼  
並請於督標下及壽春鎮標於春秋菜市旺銷之時酌  
派參遊大員帶兵三十名前往壽州合肥泗盱等處各  
巡查一次舊縣鎮等處舊設弁兵亦聽該參遊隨時調  
度稽查更可整頓經署兩江總督蘇陵阿鹽政徵瑞批  
准添設

嘉慶三年九月運司曾煥詳准山陽清河二縣之清江水  
渡口等處係淮安城守營所轄均有私販出沒請於水  
渡口至臧家馬頭一帶設兵十名板閘至鉢池山設兵  
十名巡船一隻以上二處委把總二員督緝岔河至南

武家墩設兵十名巡船一隻平橋至黃浦設兵十名巡船一隻並委把總一員督緝參將親歷稽查又於自馬湖添派把總一員兵丁十名巡船一隻往來巡緝

嘉慶四年七月鹽政徵瑞批准運司曾煥詳揚州營所轄之馬家橋北壩僧道橋三汛弁兵均爲緝私而設該汛坐落湖蕩汊港甚多應請每汛添設小划船二隻每船舵工一名水手二名以資駕緝

嘉慶五年三月運司曾煥等詳六洲張家洲太平洲帽子洲洛生洲等五洲子立江心一氣相連綿長七十餘里其中居民叢雜奸良不一迤東大江直通場竈私梟不

難長帆運販請設總巡商一名巡役五十名巡船二隻  
在於五洲江面洲上水陸汛隘實力巡緝並請委營弁  
一員給以座船一隻赴汛督緝照例半年更換經總督  
鹽政批允

嘉慶六年十一月運司曾燠詳准江南泰州營所轄各汛  
坐落泰州東臺興化三州縣境內爲通泰兩屬重運經  
由之路又與各場竈毘連私鹽最易透漏請於泰州境  
之讀書莊馬家堰樊汊廟灣白米蔣垛徐家灣大泗莊  
八處東臺縣境之于家莊鴨子河新河口丁溪趙家環  
五處興化縣境之堂子鎮戴家窰湖東口十里廳郭家

莊瓦莊三子廟七處派撥把總二員外委三員兵丁九十六名分駐巡緝並委守備一員遊巡督緝

嘉慶七年五月運司曾燠詳淮北清黃交界之帥家莊張家莊及定遠之王獬子岡向有私梟聚集囤積分運請派武職大員督同地方文武查拏經兩江總督費純飭委遊擊都司帶領弁兵分往巡緝按半年更換

嘉慶七年七月運司曾燠詳各省回空糧船南下自淮至江每有不法梟徒收販私鹽沿途賣與糧船運至江廣賤價出售以致私鹽充斥官引滯銷久經定立章程屆期飭委員弁調撥巡役分站搜查已屬嚴密惟是緝私

之法必先杜其來路淮安南北一帶實爲私鹽囤積要區請於漕標派撥弁兵飭委鹽屬一員分段巡查以一員會同武弁帶兵在於最要之涇河閘至戴家灣黃浦隄駐劄堵禦以一員會同武弁帶兵在於百子堂板閘一帶駐劄查拏並委武弁帶兵分駐小舟莊南角樓楊家廟等處巡截又自浦河之禦黃壩至寶應高郵一帶港汊繁多內通場竈外達運河六閘以內至泰州中間通江之道不少均係私鹽出沒要處總匯梟徒預先囤積潛藏俟糧船到彼乘隙濟售實爲最要隘口雖有黃河各岸及汛弁兵役巡查但道路綿長稽查難周酌派



鹽務候補十員帶役前赴禦黃壩及高寶一帶分段同該汛弁役實力堵禦查拏並另派委四員前赴六閘以內至泰州一帶協同汛弁巡緝如有前項不法梟徒窩積私鹽及載私船隻立即嚴拏究辦倘巡役得賄縱放委員失於查察一經發覺卽分別參究以示懲儆至阜甯興化通州泰興等處內連場竈外通江河亦係走私要區飭令營弁州縣各督兵徒實力巡緝外江之焦山上下卽飭所轄之圖山關五洲二汛委弁各於江面往來遊巡認真截拏如此層層堵緝梟販無從飛越糧船亦無從收買實於鹽法有裨經總督鹽政批允飭遵

嘉慶七年十一月江蘇臬司李亨特運司曾煥會詳海州境內之洪門河口逼近臨興場竈爲私鹽入口要區該處河寬二十餘丈岸高三丈以外大汎潮長水可平岸及二丈內外不等雖於附近之上坊鎮派撥弁兵巡緝而私販順風乘潮揚帆直上難免偷越請於洪門河文風閣下河面較窄之處兩岸豎立石柱就大潮水勢將到之處並以下相去丈餘各設粗大鐵練一道兩岸石柱各鑿孔眼以鐵練穿鎖橫臥河面則北來之私船均以帆檣有礙不能偷越而民載舟小身輕無須豎桅駕帆潮長則隨潮往來潮退則於鐵練下經過均無窒礙

經兩江總督費純江蘇巡撫岳起批准飭遵

嘉慶八年正月鹽政佶山奏湖廣額行引數居淮南十分之七河南額行引數居淮北十分之四近來官引滯銷並非場竈透私所致實由晉鹽侵越日久四處蔓延亦須先立晉鹽章程爲截流清源之道方足以衛淮綱門戶查晉省池鹽於乾隆五十七年課歸地丁之後聽民自運然祇准在原行引地銷售一越池鹽之界卽爲私鹽乃因彼時未定額行之數又無監掣之官鹽不完課成本甚輕而販運者獲利甚厚故趨之若鶩愈久愈多寢至蔓延他省雖兩淮南北與豫省接壤之處設卡委

巡非不周備無如犬牙相錯道里綿長堵緝巡邏旣難處處周到而私價官價貴賤懸殊卽例食淮鹽之民實難免避貴就賤臣遍訪晉鹽道路情形並核河東舊志管見所及敬爲我

皇上陳之查河南洛陽等三十二州縣向食池鹽而鄰近開封歸德等府則爲長蘆引地私販旣可以侵長蘆其汝甯府及上蔡遂平等縣例行淮北官引晉私亦可由陳州南陽等府交界侵入若湖北襄陽安陸等府向爲淮綱暢銷口岸今則晉私由南陽府屬新野等縣侵入襄陽蔓延安陸府荊門州等處民間貪賤食私至於官引不

行漢口水販觀望不前似此情形實於兩淮引課有誤不可不亟清其源也臣與湖廣督臣吳熊光札商惟有請將晉省發豫鹽斤定以限制每年豫省例食晉鹽之洛陽等三十二州縣河東志載原額運餘引共二十三萬九千九百餘道今請照額發運民間自無淡食之虞而河東運城係河東道駐劄之處即可交該道給票查驗以發足原額鹽數爲止並行各該州縣知照再河東鹽池本有城垣舊設東西中三門稱爲禁門原設有弓兵商巡總巡分門把守商運之時例閉東西二門祇准由中門出入今聽民販運則弓兵商巡總巡俱行裁革

三門均可通行似應仍存舊例於鹽池三禁門照舊設立巡役或再委妥員稽查出垣鹽數又黃河渡口止准對渡不准遠越偷渡業經部議令山西巡撫於茅津渡口責成文武員弁嚴行巡緝今請黃河對岸及下游各要隘再行專委妥員添設卡巡以杜直趨順流之弊如此池鹽出運有額稽察巡查處處有人向販池鹽之輩自不敢任意行私無所忌憚所有鹽池三禁門運城給票黃河渡口要隘各應委員設卡巡查事宜伏祈

皇上飭令山西河南撫臣與臣詳悉妥議辦理其巡緝公費兩淮眾商籌款捐解毋庸晉省籌辦庶幾淮綱藩籬不爲

晉私侵越而長蘆行豫引地亦不無有所裨益奉

上諭據佶山奏籌杜鄰私以衛淮綱一摺豫楚兩省向爲淮綱

暢銷引地今據該鹽政稱湖廣河南近來官引滯銷並非場

竈透漏所致實由晉鹽越境私販寢至蔓延是以例食淮鹽

之民俱不免有避貴就賤樂於買私等弊固屬實在情形但

佶山所奏祇就晉省池鹽而論朕聞山西地方多食阿拉善

蒙古鹽本省池鹽不能行銷以致侵越他省并有將蒙古鹽

斤販至豫楚私銷者各該處民人貪食賤鹽官鹽行銷益少

甚於引課有礙是欲截流清源不獨嚴禁池鹽私越并當將

蒙古鹽行銷處所畫定地界以杜流弊庶兩淮南北官引不

致滯銷其如何籌定章程之處著佶山會同吳熊光伯麟馬  
慧裕三人悉心妥議具奏原摺著抄寄閱看將此各諭令知  
之欽此嗣經戶部議覆湖廣總督吳熊光等會奏查蒙古鹽  
斤畫定地界山西巡撫伯麟既經遵

旨將蒙古鹽斤行銷地方見於該處及下游州縣口岸均各添  
設委員晝夜巡查自可無虞侵越但有治人無治法惟  
在辦理妥協毋使胥役滋事則蒙古鹽斤照舊行銷原  
屬易辦至池鹽一節當日改歸地丁繼又以商販既多  
未能嚴爲稽查遂以立票爲請當奉

上諭晉鹽課歸地丁原以便民茲於晉豫關津等處層層驗票



始令販運誠恐官吏等從中勒索致滋弊端而於稽查私販越境仍無裨益其如何設法嚴禁越販又不致擾累商民之處著該部詳悉妥議具奏臣部遵照指駁各在案茲復經山西巡撫奏稱池鹽每年旺產俱浮於原行額引之外侵灌他省勢所必至是非查照原額給票驗放不足以清其源臣等查給票一節不惟顯違

諭旨抑且無異官銷如令官爲給票必致滋生弊端更有貽誤其所請給票之處應無庸議

嘉慶九年三月桃源縣詳三岔地方係清桃交界又爲入湖要隘請飭撥兵會緝私販經兩江總督飭據河標右

營遊擊派委千總二員帶兵二十名在於三岔一帶往來查拏又派委把總外委二員帶兵二十名在於劉家莊十三家等處分路緝拏遊擊帶兵二十名雇募巡船四隻梭織遊巡

嘉慶九年四月運司曾煥詳安豫二省淮私必由洪澤湖行走盱眙之舊縣地方爲洪湖之要隘私鹽必由之所前奉於壽春鎮標酌派將弁兵丁分駐泗盱交界之頭鋪河北岸一帶巡緝第各處私梟總不能飛越舊縣與其分駐兵單不如扼其要領請將原派兵丁一百名統移於舊縣地方駐劄堵禦更爲得力經鹽政咨准總督

飭行移駐並委試用運判一員前往會同督緝

兩淮鹽法志卷六十

兩淮鹽法志

卷六十

轉運門

緝私二

七